



AWIG - AWIG
DESA ADAT APUH



DESA SEBATU
KECAMATAN TEGALLALANG
KABUPATEN GIANYAR

**AWIG - AWIG
DESA ADAT APUH**



**DESA SEBATU
KECAMATAN TEGALLALANG
KABUPATEN GIANYAR**

P I D A G I N G

MAKA BANTANG AWIG-AWIG DESA ADAT APOHI

MURDDHA - CITTA

WIDANG

PRATHAMA SARGAH	ARAN LAN WAWIDANGAN DESA	1
DWITIA SARGAH	PATITIS LAN PAMIKUKUH	2
TRITIA SARGAH	SUKERTA TATA PAKRAMAN	3
	Palet 1 Indik Krama	3
	Palet 2 Indik Prajuru / Dulun Desa	5
	Palet 3 Indik Kukul	6
	Palet 4 Indik Paruman	7
	Palet 5 Indik Druwen Desa	9
	Palet 6 Sukerta Pamitegep	10
	Kaping 1 Karang, tegal lan obruk ..	10
	Kaping 2 Pepayonan	10
	Kaping 3 Wewangunan	11
	Kaping 4 Wewalungan	11
	Kaping 5 Bhaya	12
	Kaping 6 Panyanggron Banjar	13
CATHURTAS SARGAH	SUKERTA TATA AGAMA	
	Palet 1 Indik Dewa Yadnya	13
	Palet 2 Indik Reei Yadnya	17
	Palet 3 Indik Pitra Yadnya	17
	Palet 4 Indik Manusa Yadnya	21
	Palet 5 Indik Bhuta Yadnya	21
PANCAMA SARGAH	SUKERTA TATA PAWONGAN	
	Palet 1 Indik Pawiwahan	23
	Palet 2 Indik Nyapian	24
	Palet 3 Indik Sentana	25
	Palet 4 Indik Warisan	27
SAT SARGAH	WICARA LAN PAMIDANDA	
	Palet 1 Indik Wicara	29
	Palet 2 Indik Pamidanda	29
SAPTAMA SARGAH	NGUWAH-NGUWUHIN AWIG - AWIG	30
ASTAMA SARGAH	S A M A P T A	31

MURDHA CITTA

AUM, OM

Om Swastyastu, Om Awighnamastu Nama Siddham.

Malarapan panghyangning Ida Sang Hyang Widhi Wasa, adung kerta nugraha ngawentenang kahuripan sakala niskala, ring Bhuwana Agung lan Bhuwana Alit. Manut dresta desane wantah pawakan pasayuban Krama Desa rawuhing kula warga pawongnya. Desane kamanggehing Bhuwana Agung, pawongnya sowang-sowang pinaka Bhuwana Alit.

Sotanin Bhuwana Agung desane wantah pawakan Bhawa maurip. Jangkep saha Tri Hita Karananya, luwire :

- ka. Parhyangan, sahananing kahyangan, panyiwian desa genah ngarcana Ida Hyang Parama wisesa, maka jiwa desane.
- na. Pawongan, krama saha warga desa maka sumi pawakan B. Prámana (Tri Kaya) mawinan desane sida molah meprawerti.
- ca. Palembang, tanah kakuwuban desa, sinanggeh stula seriraning desane.

Adung patemon bhuwana kalih, larapan santa jagadhita, sinanggeh mundhaning prayojana pangriptaning Awig-awig Desa Pakraman ring sabha Krama Desa Adat Apuh.

Pamutus sabha inucap pinaka sepat siku-siku pamatut, wasta prasida prayojanan mami kabeh prasama anghidep muwah amogehaken kadlinging Awig-awig iki.

PRATHAMA SARGAH

ARAN LAN WAWIDANGAN DESA

Pawos 1

(1) Desa Adat Puniki mawasta Desa Adat Apuh.

(2) Jebar kakuwub wawidangannya mawates nyatur :

- ka. Sisih Wetan ring Desa Adat Perean;
- na. Sisih Kulon ring Desa Adat Pisang Kuda;
- ca. Sisih Lor ring Desa Adat Sekaan, Bangli;
- ra. Sisih Kidul ring Desa Adat Tegalsuci;

(3) Desa puniki kawangun antuk 44 karang ayahan Desa lan karang gunakaya wantah tunggal banjar.

DWITYA SARGAH.....

MURDHA CITTA

AUM, OM

Om Swastyastu, Om Awighnamastu Nama Siddham.

Malarapan panghyangning Ida Sang Hyang Widhi Wasa, adung kerta nugraha ngawentenang kahuripan sakala niskala, ring Bhuwana Agung lan Bhuwana Alit. Manut dresta desane wantah pawakan pasayuban Krama Desa rawuhing kula warga pawongnya. Desane kamanggehang Bhuwana Agung, pawongnya sowang-sowang pinaka Bhuwana Alit.

Sotanin Bhuwana Agung desane wantah pawakan Bhawa maurip. Jangkep saha Tri Hita Karananya, luwire :

- ra. Parhyangan, sahananing kahyangan, panyiwian desa genah ngarcana Ida Hyang Parama wisesa, maka jiwa desane.
- na. Pawongan, krama saha warga desa maka sumi pawakan B. Prámana (Tri Kaya) mawinan desane sida molah meprawerti.
- ca. Palembang, tanah kakuwuban desa, sinanggeh stula seriraning desane.

Adung patemon bhuwana kalih, larapan santa jagadhita, sinanggeh mundhaning prayojana pangriptaning Awig-awig Desa Pakraman ring sabha Krama Desa Adat Apuh.

Pamutus sabha inucap pinaka sepat siku-siku pamatut, wasta prasida prayojanan mami kabeh prasama anghidep muwah anagehaken kadlinging Awig-awig iki.

PRATHAMA SARGAH

ARAN LAN WAWIDANGAN DESA

Pawos 1

(1) Desa Adat Puniki mawasta Desa Adat Apuh.

(2) Jebar kakuwub wawidangannya mawates nyatur :

- ha. Sisih Wetan ring Desa Adat Perean;
- na. Sisih Kulon ring Desa Adat Pisang Kuda;
- ca. Sisih Lor ring Desa Adat Sekaan, Bangli;
- ra. Sisih Kidul ring Desa Adat Tegalsuci;

(3) Desa puniki kawangun antuk 44 karang ayahan Desa lan karang gunakaya wantah tunggal banjar.

DWITYA SARGAH.....

DWITYA SARGAH
PATITIS LAN PAMIKUKUH

Pawos 2

Desa Adat Apuh ngamanggeh pangmikumuh minakadi :

- ha. Pancasila ;
- na. Undang-undang Dasar 1945 pamakas Pasal 18;
- ca. Perda Propinsi Daerah Tingkat I Bali No. 06 Tahun 1966;
- ra. Tri Hita Karana manut sada cara Agama Hindu.

Pawos 3

Luwir Patitis Desa Adat Apuh :

- ha. ngukuhang miwah ngarajegang Sang Hyang Agama;
- na. nginggilang tata Prowertine maagama;
- ca. ngarajegang kasukerten Desa saha Pawongannya sakala lawan niskala.

TRITYA SARGAH
SUKERTA TATA PAKRAMAN

Palet 1

Indik Krama

Pawos 4

- (1) Sane kabawos Krama Desa inggih punika kulawarga sane maagama Hindu saha ngamong karang utawi jenek mapaumahan ring sawidangan desa.
- (2) Sajaba punika sinanggeh tamiyu, sane kabinayang dados kalih inggih punika sane maagama Hindu, miwah siwosan ring maagama Hindu.
- (3) Indik Tamiyu punika manut pararem.

Pawos 5

Krama Desa wenten 4 (petang) pawos, luwire :

- ha. krama ngarep, kula warga sane ngamong karang, utawi manut pararem;

na. krama.....

- na. krama pangempian kulawarga sane nenten ngamong karang nanging sampun mawiwaha;
- ca. krama balu, krama sane katinggal seda olih lanang utawi istri nyane, utawi sangkaning nyapihan. Krama balu inucap kabinayang dados :
 1. Balu makrambian, inggih punika balu sane maduwe sentana dereng marabiah utawi dereng antes ngayah.
 2. Balu ngalisting, inggih punika balu sane tanpa sentana.
- ra. krama-tapukan, kulawarga manut aksara ha utawi na ring ajeng sakewanten durung antes ngayah utawi salami kantung masekolah malarapan ilikita pastika saking sekolahnya, manut pararem.

Pawos 6

Ngawit dados Krama Desa :

- na. Sangkaning ngamong karang, jenek mapaumahan utawi manut pararem:
- na. mawiwit pawiwahan.

Pawos 7

Panamaya tedun makrama Desa:

- na. nyabrang sasih kasanga saha majalaran antuk paigum saderengnya arep ring krama sane ngamong karang ayahan Desa;
- na. Jenek mapaumahan, manut pararem:

Pawos 8

Behanan Krama Desa keni tategenan luwire :

- na. ayah ngarep, mapiteges urunan miwah ayahan mamungkul;
- na. ayah pangempian, mapiteges urunan sapano saking krama ngarep;
- ca. ayah balu, ayah miwah urunannya manut kahanan balu inucap;
- ra. ayah tapukan, keni urunan mamungkul.
kaluputang ayah-ayahan, ngantos mayusa 17 warsa, utawi sampun mawiwaha. Yaning kantung masekolah, taler kaluputang ayah-ayahnya, malarapan ilikita pastika saking sekolahnya.
- ka. prade rikalaning ngayah wenten sinalih tunggil Krama matilar tanpa sadok sadereng puput karya, wenang Krama inucap keni pamidanda manut pararem, tanjek laler kawastarin.

Pawos 9

Swadharman Krama, sewosan ring tategenan, luwire :

- na. Tinut saturut ring sadaging Awig-awig, pararem lan paswasraan Desa;
- na. Tan maren ngutsahayang mangda Desane mrasidhayang nyujur manut patitis;
- ca. Tinut saturut ring Guru Wisesa.

Pawos.....

Pawos 10

Swadharmen Tamiyu, luwire :

- ha. Tinut saturut ring yasa kertin Desane;
- na. Tan piwal ring sadaging Awig-awig, pararem lan paswaran Desa;
- ca. Nyadokang raga ring Prajuru arahina sasampun jumenek malarapan antuk ilikita pastika saking desane utawi sang ngawawenang;
- ra. Yan tan tinut pacang kairid (tan kadadosang jumenek ring Desa.

Pawos 11

Picilih-olihan Krama :

- ha. Polih pasayuban sakala niskala tur kabawosin saha katiwakin pamutus sahanan wicaranya;
- na. Nyarengin paruman tur wenang sareng mastikayang pamutus;
- ca. Kadadosang madeg Prajuru, manut pararem.

Pawos 12

Krama Desa Adat kadadosang :

- ha. mapoangkid utawi tan tedun :
 - 1) rikala mapawangun ngeraabin, mayadnya, nandur (mamulih) matepetin rare, sungkan, kaluasan, lan siosan punika;
 - 2) kengin tempo wantah apisan, sajawanin wenten wak-wakan saking Prajuru Desa.
- na. nyada, mapiteges ngamademang ayah, risampun mayusa 70 wara, tur tan dados nyuksukin, yan maduwe sentana nyerodang ring sentananya yan tan maduwe sentana sang nyada mangda digelis (sajeronin 3 wara) mangda nyantenang panyeledihi;
- ca. nyade, utawi nyuksukin, sane kawenangang risampun manggeh deha-teruna utawi prasidayang nganutin krama;
- ra. nutug ayah antuk arta brana saantukan kapialang utawi ngentos ayah-ayah antuk arta barana manut paetangan soang-soang tempek. manawi kajudi olih sang mawangrat, utawi kaluasan salami 3 - 7 wahina.

Pawos 13

Wusan dados Krama Desa, luwire ;

- ha. Sangkaning :
 - 1) Pinunas ngaraga, manawi kesah kadura Desa utawi ngalangkungin sagara;
 - 2) Kanorayang , duaning sampun tan prasida ngesehin solah maprawerti satata nguwug pamargin Awig-awig.
 - 3) Wusan makrama desa mapiteges taler wusan makrama banjar utawi wusan makrama banjar mapiteges wusan makrama desa. mangda sampunang kasinanggeh empak ngelanting.

na. Sang

na. Sang wusan makrama :

- 1) Patut ngaturang karang ayahan ka Desa, prade karang punika karang Desa;
- 2) Tan polih pah-pahan saking padruweyan Desa sajawaning pah-pahan padruwen ring tempek manut pararem.
- 3) Tan polih pasayuban sajroning ala ayu.
- 4) Sang wusan makrama desa/Banjar prade mawali malih patut nawur saurah arih tategenan krama manut pararem.

ca. Sang wusan sangkanin kanorayang, prade mawali malih patut:

- 1) muntasang saluwir pamidanda utawi tategenan sane ngranayang kanorayang;
- 2) nunas geng pangampura ring paruman desa maduluran panyangaskara panyapsap kaiwangan duwaning nguwak pasubaya pecak.

Palet 2

Prajuru lan Dulun Desa (Panglingsir)

Pawos 14

- (1) Desa Adat Apuh kaenter olih Bendesa Adat.
- (2) Banjar utawi tempekan kaenter olih Klian Banjar/Tempek.
- (3) Bendesa lan Klian Banjar patut :

na. mawiwit saking krama ngarep/wed kajangkepin antuk:

- 1) Uning ring akeara latin utawi Bali;
- 2) Uning ring tata titining mawa desa;
- 3) Uning ring pariindik Agama lan Adat;
- 4) Laecarya ngayah tur madruwe parilaksana sane rahayu.

na. kaadegang malarapan antuk kacatri olih parumannya soang-soang nyabran 5 (limang) warsa, sajawaning wenten pariindik tios, tur dadoe kacatri malih;

ca. maduluran Dewa sakei ring Pura Bale Agung.

Pawos 15

(1) Bendesa Adat kasanggara olih :

- na. Patajuh utawi Pangliman pinaka wakilnya;
- na. Panyarikan pinaka juru surat;
- ca. Patengen utawi juru raksa pinaka pangamong druwen Desa;
- ra. Kasinoman pinaka juru arah.

(2) Kasinoman sakehnya manut kawigunan saha magilir nyabran ngasasih.

(3) Sajeroning ngenterang kasukertan niskala, Bendesa mingsinghang Pamangku Kahyangan Desa utawi sang Rumaga Sulinggih.

Pawos

Pawos 16

(1) Swadharmaning Bendesa Adat luwire :

- ha. ngenterang pamargin sadaging Awig-awig miwah pararem Desa;
- na. nuntun tur ngenterang krama rawuhing warga Desa sami ngupadi manut patitis;
- ca. mawosin kalih niwakang pamutus arsip ring wicara warga Desa;
- ra. maka dutta Desa matemuang bawos ring sapa sira ugi.

(2) Prade Prajuru iwang palaksana keni pamidanda nikel ring kaiwangan soang-soang krama, tur dados kararyanang manut pararem.

Pawos 17

Patias utawi olih-olihan Prajuru/Dulun Desa, luwire :

- ha. luput rerampen lan papeson;
- na. polih tanding tengah;
- ca. upon pacatu/palaba carik/tegal;
- ra. patias sewosan manut pararem.

Pawos 18

(1) Prajuru / Dulun Desa kagentosin riantukan :

- ha. s e ; d a ;
- na. kanorayang dwaning iwang pamargi utawi nilar sesana;
- ca. wit saking pakayun utawi pinunas ngaraga.

(2) Nganorayang utawi ngentosin Prajuru/Dulu-dulu patut sajeroning paruman tur kaingkupin olih Krama Desa.

Palet 3

Indik Kulkul

Pawos 19

(1) Kulkul ring Desa luwire :

- ha. Kulkul ring Kahyangan;
- na. Kulkul Desa;
- ca. Kulkul Banjar;
- ra. Kulkul Sekaa-sekaa.

(2) Tabuh tatepakatan kulkul ring Kahyangan Desa :

- ha. nungtit/éilih asih, tengeran wenten Yadnya/Upacara;
- na. tulud lambat, tengeran tedun ngayah;
- ca. bulus, tengeran wenten bhaya.

(3)

(3) Tabuh tatepakan kulkul ring soang-soang bebanjaraan :

ha. Bulus :

- 1) 3 (tigang) tulus bulus, tengeran kageni bhaya;
- 2) atulus bulus, tengeran kapandangan (artha bhaya);
- 3) 5 (limang) tulus bulus, tengeran jiwa bhaya;
- 4) tigang klentungan bulus panjang, tengeran lindu. er, lan pawana bhaya.

na. Lambat :

- 1) 2 (kalih) tulus lambat, tengeran tedun ngayah utawi wenten pakaryan.
- 2) nungtit eilih asih tengeran, surya arha, bulan kapangan;
- 3) atulus dabdab, tengeran rare embas.

ca. Klentungan :

- 1) 7 (pitung) klentungan, tengeran pawiwahan;
- 2) 3 (tigang) klentungan panjang, tengeran ngawangdeang karya;
- 3) 5 (limang) klentungan, tengeran kalayu sekaran.

Pawos 20

- (1) Kulkul Desa utawi Banjar tan wenang katepak yening tan sangkaning pituduh Prajuru Desa / Banjar sajawaning tengeran bhaya.
- (2) Sang nepak tan sangkaning pituduh patut digelis atur supeksa maka buatan panepake, yan tan sapunika wenang sang mamurug kadanda manut pararem.
- (3) Kulkul sekaa-sekaa samaliha kulkul pondokan-pondokan tan kalugra nyawerin (matehin) sukat utawi tengeran kulkul Desa / Banjar sajawaning tengeran bhaya, prade mamurug taler kadanda manut pararem.

Palet 4

Indik Paruman

Pawos 21

(1) Paruman/ sangkepan ring Desa Adat Apuh, wenten :

ha. paruman Desa, kawentenang :

- 1) nyabran ngasasih, maka cihna tanpa arah-arah, lwaning sampun tetep panamaya manut pararem babanjaraan, nemonin rahina Bhuda Kliwon.
- 2) napkala (padgata kala) maka jalaran arah-arah manut tatujon.

na. sangkepan Prajuru/ dulun desa, kawentenang manut wiguna;

ca. paruman sekaa-sekaa manut pabuat.

(2) Paruman.....

(2) Paruman Desa utawi Banjar madudonan sakadi ring sor :

ha. prasida lumaksana risampun katedunin olih sang patut ngamiletin, kamanggala antuk tengeran kulkul miwah mabusana Adat madya, saha tan kalugra makta gegawan sakaluwire, tan maren ngarcana ring Ida Bhagawan Panyarikan maka sarana Widhi Widana cane;

na. maka sarana janggi, pangawit kalaksanayang panyacak sep-sepan saha riwusannya nyacak, ngetang dadosan gung alit manut panarem;

ca. tan kalugrat ngawetuang suwara gora utawi byota, yan wenten asapunika kakeni pamidanda beya pacamil kadi dandaning nguman-uman ring sabha;

ra. pamutus babawos beruk sapanggul (ingkup) punika kamanggahang.

(3) Prade pidaging paruman tan kaingkupin mangda Prajuru/Dulun Desa ngilikang babawos, saha pamutusnya mangda kararemin olih Krama Desa, bilih tan prasida kasungkemin jantos ping tiga Prajuru/Dulu wenang nunas bawos ring Sang Ngawa Wenang.

(1) Sajeroning paruman Desa, Bendesa patut nyobyahang pamargin ngenterang Desa, pamekas nganinin indik:

ha. munjuk lungsuring pakraman saha ayah-ayah, sulur arta berana, druwen Desa;

na. Rarincikang Prajuru / Dulu nganinin usaha Desa kapungku.

(2) Pamutus paruman Desa sinanggeh pararem maka pamitegep daging Awig-awig.

Pawos 23

(1) Sangkepan Prajuru/Dulun Desa kawenangang wantah ngarincikang pangerencana usaha Desa kapungkur.

(2) Sangkepan Prajuru/Dulun Desa tan kawenang ngawedalang tategenan ring Krama sadereng kaingkupin olih Krama Desa ring paruman.

(3) Pamutus sangkepan prajuru/Dulun Desa ngawetuang pasuwara, maka pidaging pituduh sang Ngawawenang utawi ngonekang pecak pararem krama desa.

Palet.....

Palet 5

Indik Druwen Desa

Pawos 24

Padruwen Desa Adat Apuh sakadi ring sor :

na. Kahyangan Desa luwire :

- 1) Kahyangan Tiga : Pura Desa lan Bale Agung, Pura Puseh, Pura Dalem lan Praja Pati.
- 2) Pura Melanting.
- 3) Pura Taman Sari.
- 4) Pura Jaba Kuta.
- 5) Pura Panti Kangin.
- 6) Pura Panti Kauh.
- 7) Pura Pakémit (sareng Desa Adat Tegal Suci).

na. Wantilan Desa;

ca. Tanah tegalan (manut ilikita);

ra. Karang ayahan Desa, munjuk lungsur saking 44 karang ring adang;

ka. Setra;

da. Palaba Pura, carik/tegal (manut ilikita)

ta. Lelanguan, makadi tetabuhan lan ilen-ilen padruwen Desa/
bebanjaran luwire :

1) Gong;

2) Klentangan;

3) Muwah padruwean tiyosan.

sa. Nyasa, sasanthi.

Pawos 25

Piolih-olihan Desa Adat Apuh luwire :

na. piolih-olihan saking palaba Pura;

ne. urunan Krama Desa Adat;

ca. paica saking juru Wisesa;

ra. Paica-paica sane tiyosan, sane patut;

ka. usaha Desa Adat.

Pawos 26

(1) Prajuru / Dulun Desa wenang ngetangang pamupon laba Pura lan sapanunggalan druwen Desa.

(2) Pikelih lan pamuponnya kaanggen prabeya piodalan saha wewangunan ring Pura miwah anggen kabuatan Desa Adat.

(3) Nyabran pasangkepan Desa, Prajuru /Dulu pangamong druwe desa nguningayang pariindik munjuk lungsur ring padruwean ring Krama Desa.

(4) Sakaluwiring druwen Desa patut wenten ilikitannya.

(5) Tan kalugra ngadol utawi ngesahang padruweyan Desa yan tan kasungkemin olih Krama Desa ring paruman.

Palet

Palet 6

Sukertan Pamitegep

Kaping 1

Karang, Tegal lan Carik

Pawos 27

- (1) Krama Desa pangamong Karang Desa utawi karang gunakaya patut ngawatesin karang inucap antuk tembok utawi pagehan mangda pakantenannnya asri.
- (2) Wates sisi kaler miwah kangin patut kakaryanin olih sang ngamong karang ayahan inucap, sane mawasta gegaleng kaluan, sajawaning tanah pacatu, tegal, carik utawi tanah padruweyan ngaraga, sane kapiara watese sisi klod miwah kauh utawi manut drestha reh punika mawasta gegaleng kateben.
- (3) Prade karasayang pagehan/turus inucap ngalikadin, yen pada area panyandinge, kengin watese nganggen pinget kewanten, kasaksinin olih Prajuru/Dulun Desa utawi pracihna pal saking Sang Ngawawenang.
- (4) prade wenten karang kabebeng /embet mangda kautsahayang wenten pamarginnya,manut paigum lan pararem.

Pawos 28

- (1) Sinalih tunggil Krama Desa/Banjar tan kalugra :
 - na. Ngalah-alah margi, tegal ayahan Desa, karang Desa, lan sapanunggalanya;
 - na. ngalah-alah tanah linggih kahyangan, tegak setra, lan sakancan linggih sinanggeh suci.
- (2) Prade wenten sakadi ring ajeng ,sang ngalalah wenang ngawaliang tanah inucap saha keni pamidanda manut pararem kadulurin upakara prade ngalahlah tanah suci.

Kaping 2

P e p a y o n a n

Pawos 29

- (1) Ngawit nandur pepayonan tanem tuwuh patut adepa agung (1,5 meter) ngajeroang saking wates,prade jantos ngaliwat wates wenang kasepat gantungin.
- (2) Yening wenten tatanduran ngungkulin,samaliha mawastu mayanin kapisaga patut kawara antuk paiguman ping ajeng mangda prasida sang nruwenang wit ngarebah utawi notor .

(3) Prade.....

- (3) Prade sampun kawara taler tan wenten usaha sang nruwenang wit, sang rumasa katetehan/kajerihan wenang masadok ring prajuru/Dulu, tur risampun kaparitatas kalugra mademang wit inucap, sakewanten patin pepayonan patut katawur manut pangeloika sane nepasin.
- (4) Sang keni pamidanda panyangaskara saha prabeya manut pararem arep ring wewangunan sang karubuhin, luwire;
- ha. Sang nruwenang wit sinanggeh mayanin, prade pungkut ngarubuhin wewangunan krama tiyos;
- na. Sang notor, munggul utawi ngarebah taru tur ngarubuhin krama tiyos.
- (5) Prade wenten wit mentik sajronin wates patut kapademang, mangda tan ngranayang wicara. Prade sampun ageng kapademang, wit punika pinara tiga :
- ha. Apah tiga katur ring sang nruwenang wit.
- na. Apah tiga katur ring sang penyandingnya.
- ca. Apah tiga katur ring Desa Adat.
- (6) Krama Desa patut ngamanggehang kawerdian tanem tuwuh sane ngawinang Desane asri.

Kaping 3

Wewangunan

Pawos 30

- (1) Nyabran ngawangun patut :
- ha. masadok ring Prajuru / Dulu, ping ajeng prade wewangunan nganinin wates;
- na. ngangge sukat asta bhumi miwah gagulak asta kosala - kosali, sanistane manut ring patitis niskala;
- ca. tan nyayubin kapisaga.
- ra. tan dados ngembahang toya wit saking jempeng/W.C. miwah belengbeng/bada ka pisaga.
- (2) Prade wewangunan jantos nyayubin bilih-bilih temboke ring telengin wates, risampun kawara tur kaadokang ring Prajuru/Dulu, wenang kadanda manut pararem saha cembok inucap kagubar utawi sanistane mangda kakaryanang abangan.

Kaping 4

Wewalungan

Pawos 31

- (1) Warga Desa sane mamiara wewalungan patut sayaga nitenin negul/ngalogor mangda tan ngarusak karang utawi pabianan Krama sewos, bilih-bilih jantos ngaranjing ngaletihin Kahyangan.

(2) Prade.....

- (2) Prade wenten wewalungan malubar utawi ngeleb ngarusak pakarangan/pabianan Krama sewos, risampun kawara dados kataban tur kadanda ngawaliang wit sane karusak saha nawur panebae papiaran tetaban, manut pangeloikan Prajuru/Dulun Desa.
- (3) Prade jantos ngaletihin linggih suci, minakadi Pamrajan, risampun kaparitatas olin Prajuru/Dulu wenang sang nruwenang kadanda mabuhu agung (caru eka sata, maduluran tebasan prayascita durmanggala), prade ngaletihin Kahyangan Desa utawi Pura Pamaksan, wenang nyaronin antuk Panca sata makerep itik belang kalung.
- (4) Krama desa patut nyanggra wewalungan miwah sarwa prani, tan kapatutang ngamademang paksi, nuba ulam, miwah sane sewosan. Prade wenten malaksana sakadi punika keni pamidanda manut pararem tur kaaturang ring sang Ngawawenang.

Kaping 5

B h a y a

Pawos 32

- (1) Pariindik bhaya, luwire : jiwa bhaya, artha bhaya (kapandangan), dura cara ring Agama.
- (2) Sang manggihin kahanan jiwa bhaya, patut nepak kulkul bulus mapitulung manut pawos 19 (3) aksara ha.
- (3) Prade ring Desa kahanan jiwa bhaya, patut Desane ngaturang Bhuta Yadnya, tur sang mayanin kaaturang ring Sang Ngawawenang.
- (4) Prade wenten jatma mamisuh utawi nguman-uman jadma tiyos, kakenanin pamidanda beya pacamil maduluran tebasan prayascitta.
- (5) Yaning wenten jatma majengilan ring bale Banjar, ring Pura, utawi ring genah sane kasinanggeh suci, keni pamidanda manut pararem, maduluran panyangaskara prade sang majengilan kantos ngamedalang rah.

Pawos 33

- (1) Sang manggihin kahanan artha bhaya (kamalingan), patut ngulkul mapitulung manut ring pawos 19 (3) aksara ha utawi sang kamalingan atur supeksa ring Prajuru / Dulun Desa sane pacang nimbangin utawi nandanin manut pararem, saha nawur panyangaskara prade wenten jatma ngamaling belang sinanggan suci.
- (2) Pratingkahe mapillon ring dusta kabawos saruron, prade wenten jatma manggihin maling tan nyadokang ring Prajuru/ Dulu jantos jatma tios nyaduang, patut kadanda kadi dandaning maling, sakweh pangargan wit manut cacakan Banjar, tur prade jantos ping tiga malaksana asapunika wenang kasukserah ring sang Ngawawenang.

(3) Prade.....

- (3) Prade wenten jadma ngarereh reramon, minakadi daun kelapa, ron miwah sane sewosan tanpa sadok ring sang nruwenang wit, prade kacunduk (katara) patut kadanda kadi dandaning maling.
- (4) Yening wenten jatma ngaranjing kapakubon wiadin pakarangan jatma tiyos rikala suwung, mawastu sang madruwe karang kaicalan, wenang jatma inucap katuwekang antuk madewa saki ring Pura Bale Agung.
- (5) Mangda tan katuwekang manut sakadi ring ajeng, asing-asing ngaranjing kapakubon jatma tiyos patut :
- ha. matengeran suwara (makaukan);
 - na. nyantos sang nruwenang karang rawuh utawi masadok ring pangapit pinih tampek, maka buatan pangaranjinge;
 - ca. pamedal, karangnya kadagingin sawen, maka cihna pangarah rikala suwung.

Kaping 6

Panyanggran Banjar

Pawos 34

Krama Desa rikala ngawentenang karya suka-duka, patut kasanggria olih Banjar, luwire :

- ha. Prade ngawangun Pitra Yadnya utawi Manusa Yadnya, manut pinunas sang mayadnya;
- na. Pangarombo utawi karya gotong-royong krama jantos ping tiga, langkungan ring punika patut katuran pangingu;
- ca. Pangingu rikala Pitra Yadnya manut abot dangan Yadnya, prade saking semengan ngantos wengi katuran pangingu ping kalih.
- ra. Pangarombo tiyosan manut pararem.

CATHURTAS SARGAH

SUKERTA TATA AGAMA

Palet 1

Indik Dewa Yadnya

Pawos 35

(1) Kahyangan Panyiwian ring sawidangan Desa Adat Apuh luwire:

- ha. Kahyangan Tiga, Pura Desa/Eale Agung, Puseh miwah pura Dalem lan Prajapati;
- na. Pura Taman Sari;
- ca. Pura Melanting;
- ra. Pura Panti Kangin;
- ka. Pura Panti Kauh;
- da. Pura Jaba Kuta;
- ta. Pura Pakemit (sareng Desa Adat Tegalsuci)

(2) Rahina.....

(2) Rahina Piodalan ring soang-soang kahyangan inucap, kadi ring sor;

- ha. Ring Kahyangan tiga, luwire;
 - 1) Pura Desa/Bale Agung, rikala Purnamaning Kapat;
 - 2) Pura Puseh, rikala Purnamaning Kapat;
 - 3) Pura Dalem, rikala Tileming ka Desa;
- na. Pura Prajapati rikala Anggarakasih Perangbakat;
- ca. Pura Melanting rikala Bhuda Wage Kelawu;
- ra. Pura Panti Kangin rikala Purnamaning Kapat;
- ka. Pura Panti Kauh rikala Purnamaning Kapat;
- da. Pura Jaba Kuta rikala Tumpek Uye;
- ta. Pura Pakemit rikala Purnamaning Kapat.

(3) Pangadi ring Pura inucap manut kecap sastra Agama, saha kalaksanayang nieta, madia, utama manut kawentenan lan pararem

(4) Pangempon soang-soang Pura manut dresta kadi ring sor:

- na. Pura Puseh, kaempon olih Desa Adat Apuh;
- na. Pura Bale Agung, keempon olih Desa Adat Apuh;
- ca. Pura Taman Sari kaempon olih krama Desa Apuh;
- ra. Pura Dalem, kaempon olih Desa Adat Apuh.
- ka. Pura-Pura siwosan, minakadi;
 - 1) Pura Melanting, keempon olih Desa Adat Apuh;
 - 2) Pura Prajapati, keempon olih Desa Adat Apuh;
 - 3) Pura Panti Kangin, keempon olih Desa Adat Apuh;
 - 4) Pura Panti Kauh, keempon olih Desa Adat Apuh;
 - 5) Pura Jaba Kuta, keempon olih Desa Adat Apuh;
 - 6) Pura Pakemit, keempon olih Desa Adat Apuh lan Desa Adat Tegalsuci;

Pawos 36

(1) Ring soang-soang Pura inucap patut kaadegang Pamangku:

(2) Ngadegang Pamangku manut dudonan :

- ha. Nyanjan utawi masemurang, soang-soang mapiteges mapinunas ring ajeng Pura wiadin kadura Desa manawi ring ballan konteng, lan sapanunggilannya;
- na. Turunan utawi waris;
- ca. Kacatri olih krama Desa.

(3) Tan kawenang adegang Pamangku luwire :

- ha. Cendangga makadi peceng, perot, cungh lan sapanunggilanipun;
- na. Sang sapa sira ugi sane tan kapatutang manut pararem;
- ca. Sakit ila, ayan, buduh wiadin edan;
- ra. Sane tan madrebe kasucian urip.

(4) Prabia.....

(4) Prabia kapamangkuan :

- ha. Adiksa Widhi (ngawintenin) lanang istri kamedalin saha kalaksanayang olih sang ngadegang, makadi krama Desa utawi pangempon Pura soang-soang;
- na. Mapitra Yadnya riwekas lanang miwah istri patut kasungkemin olih Krama Desa utawi pangemong, sanistane Brahmapravascita, panyanggrane manut pararem prade Yadnya inucap kalak-
- ca. Sinalih tunggil krama yan wenten ngipik-ipik sapari polah pamangku, nanging pamangku tan sapunika pari polahnya kadi sane kaipik-ipik, wenang Jadma inucap kasisipang nyuciang pamangku, manut pararem.

(5) Pamangku patut ngamanggehang sesananing Pamangku luwire :

- ha. Ambek Dharma sadhu;
- na. Aewaka Dharma, makadang sestra utama;
- ca. Tan parek ring naya dustha;
- ra. Tan atayub ring tarub camara yudha;
- ka. Tan manjing ring umah wong banija karma;
- da. Tan manjing ring umah wong darati krama;
- ta. Tan wenang ajajuden;
- sa. Tan anginum asing angawe meda;
- wa. Tan pati pikul-pikulan;
- la. Tan salah suluh;
- ma. Tan wenang anayub upadrawaning cor, yan mawiyawahara teka wenang adewa saksi;
- ga. Tan griganing wong akweh;
- ba. Tan keneng cuntakaning wong len, sajawanin kulawarganya tunggil natah, utawi pasiwanya manut dresta.

(6) Prade mamurug, wenang Pamangku nyepuhin raga kasaksinin olih Prajuru Desa.

(7) Yan pacang ngawalat rabi wenang ngaturang rumuhun pawintenanya, ring pura genahnya madeg pamangku nguni, tembenya wawu wenang ngawalat rabi, riwus upacaraane wenang ngawana wasa salaminya atahun, wus punika wawu mawinten lakibi kadi pawintenanya nguni.

Pawos 37

Swadharman Pamangku luwire :

- ha. Ngenterang upacara piodalan ring Kahyangan utawi ring soang-soang pakubon krama;
- na. Prade salah sinunggil Pamangku kapialang utawi cuntaka, kengin nguntap Pamangku kahyangan desa tiosan utawi nuwur sang sulinggih;
- ca. Samaliha yan sampun Pamangku ngayah ring Pura kancit wenten kulawargannya seda, Pamangku inucap tan keneng cuntaka sakewanten Pamangku tan budal salami piodalan.

Pawos

Pawos 38

Patias utawi olih-olihan Pamangku luwire :

- ha. Panyolongan miwah sarin canang ring soang-soang pakubon krama Desa;
- na. Upon palaba carik miwah tegal manut pararem;
- ca. Luput pakaryan, rerampen/reramon, lan padagangan (luput manuk);
- ra Patias sewosan manut pararem.

Pawos 39

(1) Pamangku kagentosin riantukan :

- ha. S e d a ;
- na. Pinunas ngaraga, sangkanin kageringan lan sapanunggalannya;
- ca. Kauwusang olih krama sangkanin malaksana sane tan patut.

(2) Prade, Pamangku kauwusang sangkaning malaksana tan patut keni pamidanda manut pararem saha ngawaliang prabiya pawintenannya pecak.

Pawos 40

Kasukertan Kahyangan kadi ring sor :

ha. Tan kalugra ngaranjing kapura luwire :

- 1) Sang katiben cuntaka makadi sebel ring raga utawi kepademan;
- 2) Maktā sahanan barang sinaggeh ngaletihin;
- 3) Sato agung, sajawaning rikala mapapada;
- 4) Mabusana sane tan patut kadi tatacaraning ngaranjing kapura;
- 5) Sadereng polih wak-wakan (pituduh) Prajuru /Dulun Desa.

na. Pratingkahe tan wenang ring Pura :

- 1) Masumpah (cor) sajawaning pituduh Prajuru/Dulun Desa;
- 2) Wak parusya/wak capala, makobetan, masasenengan, makolem dados asiki lanang wadon, mabacin, mawarih, macecepin rare, majaljal/majengilan, nyangeang busana, menahin pusungan (santukan punika rikala majajahitan patut ngelung busang macingor lidinya);
- 3) Munggah tedun palinggih sajawaning pituduh Prajuru/Dulu.

ca. Sang mamurug kecap ring ajeng keni pamidanda pamrayascitta sapatutnya.

Pawos 41

(1) Yan wenten jatma karawuhan ring Pura, dados kapintonin prade rumasa kasumangsayan, yan tan wiakti, jatma inucap kasisipang manut pararem.

(2) Prade Kahyangan kahanan durmanggala, minakadi keni bhaya Pamangku/Sang manggihin, patut digelis nyadokang ring Prajuru/Dulu mangda marumang krama Desa tur ngawentenang pamrayascitta sapatutnya.

Palet.....

Palet 2

Indik Resi Yadnya

Pawos 42

- (1) Sang pacang madeg Pandita utawi Pinandita minakadi Balian Sonteng, Kubayan, Dalang, sakaluwiring sane jagi ngenterang Yadnya patut masadok ring Prajuru Desa utawi Parisada Hindu Dharma Indonesia.
- (2) Prajuru Desa patut ngawas nitenin tur wenang ngalangin prade wenten kacihnian nyasarring kakecap miwah drestane, tur sareng nyaksinin upacaranya saha nyobyahang ring paruman Desa tegap rawuhing wates kawenangannya ngenterang yadnya.
- (3) Krama Desa patut ngaturang ayah sapamadeg miwah ring pangelepas Sang Sulinggih riwekas katuntun olih Prajuru/Dulu Desa.

Pawos 43

- (1) Sang Sulinggih lan pamangku patut ngariyining muputang ring wawidangan Desa Adat Apuh, sasampun punika wawu muputang yadnya kajebat tios Desa utawi kadura Desa.
- (2) krama desa sami patut sareng ngawas nitenin katuntun olih Prajuru/Dulu-dulu, mangda sahanan yadnya sane kawentenang kaicen pamuput olih Padanda utawi Pinandita manut kawenangannya soang-soang.

Palet 3

Indik Pitra Yadnya

Pawos 44

Panargin Pitra Yadnya madudonan manut sakadi ring sor :

- na. Pangupakaran Sang kalayu sekaran :
 - 1) antuk mendem utawi ngeseng, makacihna pakingsan ring ibu Pratiwi utawi ring geni, salami nuptupang prabeya;
 - 2) Atiwa-tiwa (upakara pangabenan / palebon).
- na. Upacara upakara Pitra Yadnya riwusan kaabenang ngraris munggah daun bingin (ngaroras) manut dudonan Atma Wedana.

Pawos 45

Swadharmaning lan tategenan, prade wenten sinalih tunggil Krama kalayu sekaran :

- na. Sang kaduhkitan patut :
 - 1) nyadokang ring Kliat tur nunas tatimbangan ring kawentenanya;
 - 2) ngaturin Banjar ngarombo makarya eteh-ete sawa saha ngeter kasetra, tur katuran panyambrama canang sasida-sidaan.

na. swadharmaning.....

- na. Swadharmaning Banjar :
- 1) Klijan Banjar maritatas pamargin sang kaduhkitan, napike pacang kapendem, makingsan riyin utawi lantur kaabenang;
 - 2) Prade kapendem, raris kaswarayang kulkul pamitahu manut pawos 19 (3) aksara na olih Klijan Banjar utawi wakilnya.
 - 3) Panyanggran Banjar salanturnyane :
 - ha) soang-soang Krama Banjar nedunang patus beras, adeng kelapa, miwah manut pararem.
 - na) ngarombo ngaryanin eteh-ete sawa, kasarengin olih Krama sane rawuh ngarombo.
 - ca) sami Krama banjar nganter kasetra jantos puput pamendemane.
- ca. Tan kengin ngalelet langkungan ring 7 (pitung) rahina sajawaning pacang kapalebunan, tur patut polih pagebagan manut paetengan Klijan patus / Banjar.
- ra. Tan kalugra nginepang bangbang miwah mendem rikala:
semut sadulur,
kala gotongan,
Pasah,
Kliwon; kajeng Kliwon,
Soma, Umanis, Taulu,
Was panganten,
Ingkel wong,
Prawani, Purnama, Tilem,
Rerahinan jagat.
- ka. Prade wenten kalayu sekaran rikala piodalan, kengin mendem tanpa sadok, tan nyuwarayang kentongan/kukul tur mamargi wengi/sasiliban utawi ka setra siosan (setra pakingsan).
- da. Pamargin pamendeman utawi palebonan mangda nganutin sastra agama lan dresta.

Pawos 46

- (1) Sane kasinanggeh kacuntaka sakadi ring sor :

- ha. cuntaka antuk kalayu sekaran;
- na. cuntaka antuk ngraja swala;
- ca. cuntaka antuk ngembasang putra;
- ra. cuntaka antuk karuron;
- ka. cuntaka antuk sakit ila, buduh;
- da. cuntaka antuk pawiwahan;
- ta. cuntaka antuk gamia gamana;
- sa. cuntaka antuk salah timpal;
- wa. cuntaka antuk yening wenten anak istri mobot nenten kaupakarayang pabiukawonan miwah pawidiwidana;
- la. cuntaka antuk mamitra ngalang;
- ma. cuntaka antuk yening wenten anak istri ngamedalang putra sadurunge maupakara pabiukaonan miwah pawidiwidana;
- ga. cuntaka antuk sad Tatayi.

(2) Sengker.....

(2) Sengker cuntaka manut kawentenannya:

- ha. cuntaka kalayu sekaran, cuntakanya kaanutang ring loka dresta Desa Adat soang-soang;
- na. cuntaka ngraja swala, 3 rahina ngawit saking ngraja swala utawi salaming ngraja swala;
- ca. cuntaka ngembas putra, 42 rahina (abulan pitung rahina) ngawit saking putrane embas, utawi ngantos sampun kaupakarayang makakambuhan lan maperayascita manut sastra Agama, lanang wiadin istri;
- ra. cuntaka karuron, cuntakanya abulan pitung rahina (42 rahina) tur sampun matirta pamerayascita;
- ka. cuntaka sakit ila, buduh/edan, cuntakanya manut ilikita pastika saking Sang Ngawawenang/sang nambanin miwah sampun mrayascita raga;
- da. cuntaka pawiwahan, cuntakanya ngantos sasampune matirta pabiukaonan;
- ta. cuntaka gamia gamana, cuntakanya ngantos sasampune kapalabang/kasapihang tur sampun kawentenang pamrayascita raga miwah pamrayascita Desa Adat/Kahyangan;
- sa. cuntaka salah timpal kapuputang manut ring sastra Agama Hindu;
- wa. cuntaka, anak istri mobot nenten kawentenang upakara pabiukaonan, cuntakanya ngantos kawentenang upakara pabiukaonan;
- la. cuntaka mamitra ngalang, cuntakanya ngantos kawentenang upakara pabiukaonan;
- ma. ngembasang putra nenten kawentenang upakara pabiukaonan miwah pawidiwidana, cuntakanya ngatos wenten sane mameras sang putra, lan sampun kawentenang upakara manut ring sastra Agama Hindu;
- sa. cuntaka Sad Tatayi, cuntakanya ngantos sampun maperayascita raga tur nenten pisan dados ngamungsahang upakara padwijatian.

(3) Cuntaka kalayu sekaraan/kapademan :

- ha. Kapademan cuntakanya :
 - 1) cuntaka/sebel kabanjar ngantos 3 rahina riwusnya mendem/manut dresta utawi sasampun polih pamrayascita,
 - 2) kulawargania sajeroning pakarangan ngantos 42 rahina.
- na. Kaabenang cuntakanya :
Sang nyambut karya Pitra Yadhya cuntakanya ngawit saking nyambut padewasan karya, wusan mapegat kalanturang malih tigang rahina.

(4) Sane katiben cuntaka luwire :

- ha. Kalayu sekaran sane kacuntaka :
 - 1) sang sane kalayu sekaran;
 - 2) kulawarganya;
 - 3) babanjaran;
- na. Ngraja swala sane kacuntaka :
- Sang sane ngraja swala.
- ca. Ngembas putra sane kacuntaka :
- Kawulawargania sane ngembasang putra lanang wiadin istri.

ra. Pawiwahan

- ra. Pawiwahan sane kacuntaka :
 - Sang sane ngalaksanayang pawiwahan lanang wiadin istri.
- ka. Sakit ila, buduh, sane kacuntaka raganya dawak.
- da. Karuron sane kacuntaka:
 - Kawula warganya lanang wiadin istri.
- ta. Gamia gamana sane kacuntaka :
 - 1) Sang sane ngalaksanayang gamia gamana;
 - 2) Desa Adat nyane/kahyangan.
- ea. Salah timpal sane kacuntaka :
 - 1) sang sane malaksana salah timpal;
 - 2) kulawarganya;
 - 3) Desa Adat;
 - 4) Kahyangan.
- wa. Anak istri mobot nenten kawentenang upacara pabiukaonan sane kacuntaka :
 - Sane maraga istri (sane mobot)
- la. Mamitra ngalang sane kacuntaka :
 - Sane ngalaksanayang mamitra ngalang.
- ma. Ngembas putra nenten kawentenang upacara pabiukaonan miwah upakara pawidi-widana sane kacuntaka :
 - 1) Sang sane ngembasang putra;
 - 2). Putra sane mbas.
- ja. Sad Tatayi, sane kacuntaka :
 - Sang malaksana Sad Tatayi.

(5) Tan keneng cuntaka, luwire :

- 1) Sang sulinggih lan Pamangku Kahyangan tiga;
- 2) Rikala piodalan risampun ngalang sasih/ngalang tengah.

Pawos 47

(1) Attiwa-tiwa (pangabenan) kalaksanayang antuk :

- ha. Sawa prateka, pangabenan mawatang sawa;
- ca. Sawa reei, pangabenan mawatang antuk sawa kresyan;
- ca. Suwasta, pangabenan mawatang sawa sane tan kakeniang, kagentos antuk lalang utawi toya.

(2) Panamayan pangabenan wenten kalih pawos :

- ha. Ngaben dadakan/bah bangun manut pararem;
- ca. Ngaben ngamasa, manut pararem.

(3) Dudonan pangabenan ngawit saking ngagah (seda), ngeseng ngantos pangiriman utawi nganyut.

Pawos 48

(1) Pepatusan pangabenan wenten kalih pawos :

- ha. Ngaben ngamasa luwire : beras, ayam, kelapa, gasing, papah jaka, kelangsah miwah sane sewosan manut pararem.
- ca. Ngaben dadakan, patch sakadi patue seda kapendem.

(2) Pangingune ring Krama banjar ngawit ngayah manut abot dangan kawentenang karya.

palet.....

palet 4

Indik Manusa Yadnya

Pawos 49

- (1) Manusa Yadnya inggih punika upacara-upakara dharmaning kahuripan manusa, ngawit sakeng patemoning kama bang kalawan kama petak sajeroning garbha ngantos kalayu sekaran riwekas.
- (2) Upacara ring ajeng madudonan sakadi ring sor :
 - ha. magedong-gedongan duk pangerempinian ibiang;
 - na. duk sang kamareka medal;
 - ca. kepus odel;
 - ra. roras rahina;
 - ka. tutug kambuhan (42 rahina);
 - da. ningang sasihin (3 sasih);
 - ta. pawetuan/otonan/odalan (6 sasih);
 - sa. tutug kelih (ngraja swala wadone, ngembakin lanange)
 - wa. matatah/mapandes;
 - la. mawiwaha;
 - ma. mawinten.
- (3) Upacara-upakara inucap nista, madia, utama manut sastra Agama Hindu lan dresta.

Palet 5

Indik Bhuta Yadnya

Pawos 50

- (1) Bhuta Yadnya inggih punika upacara-upakara byakala ring Pratiwi lan Kahyangang, sarwa prani saha upacara-upakara ring babuthan miwah ring piranti sewosan.
- (2) Upacara pabyakala ring sarwa prani, sarwa tumuwuh muwang piranti miwah :
 - ha. Ring sarwa lelandep rikala Saniscara Kliwon wara Landep;
 - na. Ring sarwa tumuwuh lan piranti rikala Saniscara Kliwon wara Wariga;
 - ca. Ring sarwa syandana/wahana rikala Saniscara Kliwon wara Kuningan;
 - ra. Ring sarwa lelanguan rikala Saniscara Kliwon wara Krulut;
 - ka. Ring sarwa ingon-ingon/ wewalungan rikala Saniscara Kliwon wara Uye;
 - da. Ring sarwa ringgit, ukir-ukiran rikala Saniscara Kliwon wara Wayang;
 - wa. Upacara pakala-kalan manusa manut widana, kabawos pabyakala.
- (3) Upacara pabyakala ring Pratiwi, Kahyangang lan Babuthan kawastaning macaru.

(4) Pacaruan.....

(4) Pacaruan inucap ring ajeng nista, madia, utama, manut wiguna kadi ring sor :

ha. Ekasata;	na. Panca sata;
ca. Panca sanak;	ra. Resi gana;
ka. Tawur Agung;	da. Panca kelud;

(5) Sajawaning kadi ring ajeng kawentenang upakara :

ha. majot-jotan utawi yadnya sesa nyabran wusan ngarateng;
na. masapuh-sapuh rikala pacang wali ring pura;
ca. Pacaruan pasasih kalakeanayang nangken Tilem ngawit sesir
ka 5, 6, 7, 8, lan ka 9, sajawanin wenten durbikean jagat.

Pawos 51

(1) Nangken ngawarsa rikalaning Tilem kasanga kawentenang tawur kasanga, kalanturang antuk ngarupuk, makacihna pacang mapag rahina panyepian benjangne.

(2) Brata panyepian sane kamargiang olih krama Desa;

ha. amati geni; tankengin maapi-api;
na. amati karya; tan kengin nyambut karya;
ca. amati lelanguan, tan kengin mapneng-onengan, masuwara
gora, lan sapanunggalannya.
ra. amati lelungan, tan dados malancaran.

(3) Pabratan inucap kamargiang sakeng semeng ngantos semeng benjangne raris kaeuwarayang kulkul punika cihna pangembak.

(4) Sang mamurung kecap ring ajeng keni pamidanda manut pararem Banjar/tempek soang soang kamargiang olih patelik (pacalang Desa).

(5) Riwas rahina Nyepi (benjangne) maka cihna pangawit Isaka Warsa, patut warga Desa sami madharma Santi.

PANCAMA SARGAH

SUKERTA TATA PAWONGAN

Palet 1

Indik Pawiwahan

Pawos 52

(1) Pawiwahan inggih punika patemon purusa kalawan pradana, malarapan panunggalan kayun suka lila kadulurin upasakei sakala niskala.

(2) Pamargin.....

- (2) Pamargin pawiwahan luwire :
- ha. Pepadikan, kamanggala antuk pakrunayan;
 - na. Ngarorod, marangkat riyin wawu kakrunayang;
 - ca. Nyeburin utawi sentana nyeburin (risampun nganutin upakara pamerasan);
- (3) Pidadab sang pacang mawiwaha patut :
- ha. sampun manggeh daha - taruna (prasida nganutin Undang-undang);
 - na. sangkaning pada lila (tan kapaksa);
 - ca. manut kecap sastra Agama (tan gamia gamana);
 - ra. kasudiwadani prade pangambile tios Agama, utawi kapatiwangi.
- (4) Pamargin pawiwahan mangda taler nganutin Undang-undang Perkawinan sakeng Sang Ngawawenang.

Pawos 53

- (1) Pawiwahan sane kapatutang ring Desa, sakadi ring sor :
- ha. sampun kamargiang pabyakala utawi pasakapan, kasaksiang sakala niskala olih Pandita utawi Pinandita;
 - na. wenten pasakei Prajuru/Dulu-dulu sane mapakelingang utawi ngilikitayang pawiwahan;
 - ca. sampun matengeran suwaran kulkul;
 - ra. pawiwahan inucap ring ajeng sampun kacatetang ring sang Ngawawenang.
- (2) Parabian sane tan manut kadi kecap ring ajeng sinanggeh tan patut.

Pawos 54

Tata caraning parabian patut sakadi sor :

- na. Sapa sira ugi-pacang ngawarangang pakulawarganya patut masadok ring Prajuru/Dulu-dulu, salanturnya Prajuru/dulu maritatas manut tan manut pamargin parabine;
 - ca. pamargin pepadikan manut dudonan :
- 1) Pakrunayan jantos ping tiga, saha soang-soang malarapan:
 - ha) kapertama antuk canang /sedah;
 - na) kaping kalih antuk canang pangrawos;
 - ca) kaping tiga antuk dakeina pajati kabawos pamuput pamadikan.
 - 2) risampun puput raris sang istri kaajak budal ring pakubon sang-lanang, saha kalanturang antuk pabyakala.
 - 3) mangda puput tumus sakala niskala, raris kulawarga purusa makta pajati ring Pamarajan wadone.
- ca. Prade ngarorod/marangkat patut :
- 1) reraman lanange ngawentenang pamilaku/pangenduh antuk duta sakirangnya 2 (kalih) diri;
 - 2) pagenahan antene tan kengin ring pakubon sang lanang sadereng mabeyakala.

ra. Sajeroning.....

- ra. Sajeroning pakrunayan/pangalukuan patut :
- 1) kamanggala antuk geng pangampura arep ring reraman wadone;
 - 2) kaigumang bawos idih pakidih utawi palegayan arep ring pasewakan sang ngidih saha dewasa pakrabkambeyane riwekas;
 - 3) kacihnayang indik kapurusa utawi prade sentana rajeg kajejerang kapatut ngidih anak lanang sane kabawos pawiwahan nyeburin, tur risampun sulur pamerasan kategepin kamanggehang sentana nyeburin;
 - 4) prade tan terima pajati, pakrunayan kamargiang jantos ping tiga.
- ka. pakera-kambeyan mapiteges upacara tinas apadang (puput) mapakuren, dwaning manut sakadi ring sor :
- 1) Sajeroning kabawos ambe, kalaksanayang ring sakala niskala masarana jejauman miwah pawidi widana :
 - ha) jejauman pinaka ngambe/ngadungang kayun soang-soang pakulawangan wadone;
 - na) widi widana pinaka pajati niskala nunas wadone ring Pamrajanya.
 - 2) Sajeroning bawos kerab pamargi ring sakala :
 - ha). antuk panyaksi Krama Banjar, dwaning kaparabian matengeran swaran kulkul;
 - na) pamekas pasaksi Prajuru / Dulu-dulu sane ngilikitayang.

Palet 2

Indik Nyapian

Pawos 55

- (1) Pawiwahan prasida kawusang malarapan antuk palas parabian utawi kapademan.
- (2) Wusan mapakuren riantukan salah sinunggal seda mapiteges belu, makadi belu lanang/istri.
- (3) Palas parabian inggih punika sangkaning mawiwit wicara.
- (4) Sang ayat palas marabian patut atur supeksa pailikitan riwin ring sang Rumawos wastu tinas apadang pamutuse kabawos nyapian wawu Prajuru nyobyahang kawentenannya ring Dea saha keni panebas swaran kulkul manut pararem.

Pawos 56

Tata cara palas parabian sakadi ring sor:

1. sawur prabeaya pasaksi sinalih tunggil sami matenga;
2. pagunakayan polih pahan pada;
3. pabekel, tadtadan soang-soang kakuasa niri-niri miwah warisan kakuasa olih purusa;
4. saweruhin miwah ngupajiwain pratigentana manut swadharmaning guru rupaka;
5. sawur pamidanda panebasan swaran kulkul manut pararem;
6. ngelung jinah logika Prajuru/Dulu;
7. sepamit ring pamrajan lanange.

Pawos.....

Pawos 57

Prade riwekas sang palas kacihnun adung malih, patut :

- na. ngalaksanayang pawiwahan malih;
- na. kadenda nikel saking palase.

Pawos 58

(1) Sang balu kabinayang dados :

- na. balu luh wit sentana (sentana rajeg) miwah balu luh boya sentana;
- na. balu muani kapurusa (wit sentana) miwah balu muani nyeburin (boya sentana).

(2) Swadhärmaning balu inucap patut :

- na. ngamanggehang patibrata tan kengin ngamargiang paradara/darati krama;
- na. nguasayang waris pagunakaya, tan dados ngadol, ngadeang, makidihang lan siosan punika, sajawaning kabebasan olih pianak utawi kulawarga pinih tampek sakeng kurenannya prade pianak kantun alit-alit;
- na. kengin ngidih sentana prade wenten pidabdab sadurung sinalih tunggil padem, saha kabebasan olih kulawarga sakeng kapurusa;
- na. kawenangang mawiwaha malih, prade wenten kabebasan manut angka/aksara ring ajeng.

Pawos 59

Balu kaucap tan pageh sakadi ring sor :

- na. daratikrama utawi paradara;
- na. watilar saking pakubon tan pasadok jantos 6 (enem) sasih;
- na. lempae ring swadharma sewos-sewosan, tan prasida ngecehin solah maprawerti arep ring pituduh sane patut sakeng kulawarga purusa.

Palet 3

Indik Sentana

Pawos 60

- (1) Sentana wenten kalih pawos, sane kaucap pratisentana miwah sentana paperasan.
- (2) Pratisentana inggih punika sentana sane metu saking pawiwahan kapatut.
- (3) Prade pawiwahan tan kapatut ngawetuang sentana, mangda tan kantun kawastanin babinjat utawi astra patut kamanggala antuk penyangaskara.

(4) Prade

- (4) Prade pawiwahan tan ngawetuang sentana kengin ngidih sentana antuk upasaksi sakala niskala sane kawastanin sentana paperasan.
- (5) Sentana rajeg inggih punika, pratisentana wadon (pradana) sane kamanggehang lanang (purusa) tur risampun ngalaksanayang pawiwahan kaceburin.
- (6) Sang sane dados kaarsayang sentana rajeg inucap wiwit angka (5), inggih punika :

- ha. Pratisentana wadon tunggal;
- na. Sampun kamanggehang dados pratisentana lanang (purusa);
- ca. Kapawiwahang kaceburin kautamayang olih jadma sane maagama hindu utawi jadma sane maagama siyosan sane sampun ngalaksanayang pamarisuda raga utawi sudiwadani;
- ra. Sane ngamanggehang sentana rajeg patut mapasadok ring Prajuru Banjar, tur I Klian Banjar patut nyobyahang ring Banjar saha ngaturang ring Prajuru Desa Adat.

Pawos 61

- (1) Ngangkat sentana manut dudonan patut makacihna arta krana pamerasan sane kesakeiang sakala-niskala;
- (2) Sapa sira ugi krama pacang ngidih sentana patut masadok ring Bendesa sanistana 3 (tigang) sasih sadereng pamerasan. Bendesa ngalanturang pakarsa punika ring sang ngawa wenang;
- (3) Bendesa kawakilin olih Klian-klian Banjar nyobyahang ring sawidangan Desa, sang sapa sira ugi rumasa tan lila mangda nyadokang masengker kalih uku (14 rahina) sabanen pamerasan ring Bendesa Adat;
- (4) Prajuru /Dulu Desa digelis mawosin saha ngicenin pamutus nepek ring catur dresta miwah pararem;
- (5) Prade sulur paperasan tan manut kadi kecap ring ajeng, Prajuru/Dulun Desa wenang ngandeg sang pacang mameras saha ngicenin pamutus mangda kapuputang riyin babawos, sulur utawi wicaranya.

Pawos 62

- (1) Paperasan sane kapatut ring Desa risampun makacihna :
 - ha. Widi-widana paperasan;
 - na. Kasakinin olih prajuru Desa sane makelingang utawi ngilikitayang.
 - ca. Kasobyahang ring wawidangan Desane.
- (2) Sane kapatut peras angge sentana kadi ring sor:
 - ha. Jatma maagama Hindu.
 - na. papernahan nedunang saking sang meras ;

ca. Kulawarga.....

- ca. Kulawarga saking purusa, prade tan wenten kengin saking wadon, yening taler tan wenten wawu kengin sakama-kama (saking kayun);
 - ra. Kautamayang saking waris pancer kapurusa;
 - ka. Sinalih tunggil mawiwit saking kulawarga tunggal sanggah utawi merajan, paibon lan dadia utawi ngambilin anak tiis sakewanten sang maagama Hindu.
- (3) Kengin ngangkat sentana langkungan ring adiri, lanang wadon, prade ngangkat sentana lanang wadon, nenter kapawiwahang..

Palet 4

Indik Warisan

Pawos 63

- (1) Warisan inggih punika tetamian arta brana saha ayah-ayah ngupa di kasukerta sakala lan niskala saking kaluhurannya arep ring turunannya.
- (2) Kang sinanggeh warisan luwire:
- ha. Duwe tengah, makadi tegal, ayahan Desa, Kahyangan, pusaka siwa pakarana lan sapenunggalanya;
 - na. Pamerajan;
 - ca. Pagunakayan, tadtadan / jiwa dana, hutang piutang.
- (3) Wawu kengin kabawos warisan prade wenten :
- ha. Sang mapiturun (pawaris) ;
 - na. Katurunan (ahli waris) ;
 - ca. Arta brana miwah tategenan makacihna warisan.

Pawos 64

- (1) Ahli waris luwire :
- ha. Pratisentana purusa ;
 - na. Pratisentana pradana (sentana radeg);
 - ca. Sentana paperasan lanang/wadon.
- (2) Prade tan wenten sakadi ring ajeng, kang sinanggeh ahli waris :
- ha. Turunan purusa pernah ngunggahang, rerama lanang, pekak salanturipun rerama misan, mindon;
 - na. Turunan purusa pernah kasamping makadi kaponakan misan, mindon.

Pawos 65

Swadharmaning alih waris patut :

- ha. Nerima saha nguwasayang tetamian pahan saking kaluhurannya, makadi ngarempon sanggah, Pura saha pangupakaranya miwah nyelidihinin ayah-ayahan pawaris;
- na. ngaberang pawaris saha ngalanturang upacara-upakara pitra.
- ca. Nawurin hutang - hutang pawaris sane manut pangeloika.

Pawos.....

Pawos 66

Pangepahan waris manut sakadi ring sor :

- na. Risampun kalaksanayang Pitra Yadnya lan hutang-hutang pawaris buntas katawur;
- na. Para ahli waris polih pahan pada sangkaning pagunakayan, sajabaning karang / tegal, ayahan Desa kaamong olih ahli waris kang sinanggeh Krama ngarep;
- ca. Sinalih tunggil ahli waris kengin tan polih pahan prade:
 - 1) Nilar kawitan lan sesananing Agama;
 - 2) Alpaka guru rupaka;
 - 3) Sentana rajeg kesah mawiwaha utawi pratisentana nyeburin, soang-soang kabawos ninggal kadaton.
- na. Boya ahli waris kengin muponin hasil manut dudonan luwire :
 - 1) Sentana luh salami dereng kesah mawiwaha utawi tan alpaka guru, miwah prade madrebe pianak tan kaangkenin olih wong tua rare inucap, kengin ngawaris wantah pikolih pagunakaya sentana luh inucap kemawon;
 - 2) Balu luh wiadin muani nyeburin (soang-soang boyo sentana);
 - 3) Mulih daha utawi taruna, riantukan ring pawiwahane pecak sampun kabawos ninggal kadaton.
- ka. Pawaris kengin maweweh rikala maurip pinaka jiwa dana, tadtadan/ bekel, makacihna paweweh tetep ring pianak sane kesah mawiwaha.

Pawos 67

- (1) Prade sajeronin pakulawargan wenten ahli waris langkungan ring adiri patut :
 - na. kawentenang paigum indik pedum waris inucap;
 - na. yen tan prasida katunasang tatimbang ring Prajuru (kerta Desa);
 - ca. prade taler tan wenten cumpu ring panepas Kerta Desa, kengin katumusang ring sang Rumawos.
- (2) Prade karang inucap kaputungan, patut Prajuru/Dulu-dulu nibakang ring :
 - na. sang sinanggeh ahli waris manut pawos 64;
 - na. sang kengin anggen sentana manut pawos 62 angka (2) miwah angka (3);
 - ca. prade taler tan wenten cumpu ring panepas Kerta Desa, kengin katumusang ring sang Rumawos.
- (3) Prade jantos karang Desa kaepah utawi kasepih, patut soang-soang nedunin makrama Desa marep.

Sat Sargah.....

SAT SARGAH

WICARA LAN PAMIDANDA

Palet 1

Indik Wicara

Pawos 68

- (1) Sane wenang mawosin makadi mutusang wicara ring Desa inggih punika Prajuru / Dulu Desa sinanggeh Kerta Desa.
- (2) Tata dudonan mawosin saha muputang wicara warga desa kadi ring sor :
 - ha. Kaping ajeng kabawosin olih Kelihan Banjar.
 - na. Tan cumpu ring panepas Kelihan Banjar, karerehang pamutus ring paruman banjar.
 - ca. Prade tan cumpu ring pamutus Banjar, katumusang ring Bendesa Adat lan Kerta Desa.
 - ra. Taler tan wenten cumpu ring pamutus Bendesa lan Kerta Desa katunasang ring Paruman Desa Adat.
- (3) Prade sang mawicara tan wenten cumpu ring pamutus paruman desa lan Kerta Desa, kengin nunasang wicara inucap ring sang Rumawos.

Pawos 69

- (1) Sahana wicara mawiwit kacorahan saka luwire sinanggeh nungkasin daging Awig-awig, panarem miwah paswaran Desa/Banjar, Prajuru / Dulu patut digelis mawosin tan nyantos pasadok.
- (2) Sajaba wicara kadi ring ajeng patut nyantosang pasadok sang nunas bawos.
- (3) Panepase patut pastika nyantenang iwang patut malarapan Tri Pramana (saksi, ilikita, bukti) miwah tan maren nepek ring Catur Dresta.

Palet 2

Indik Pamidanda

Pawos 70

- (1) Desa/Banjar wenang niwakang pamidanda ring warga Desa/Banjar sane sisip.
- (2) Paniwak inucap kalaksanayang olih Bendesa/Klian Banjar.
- (3) Bacakan pamidanda luwire :
 - ha. ayahan panukun kasisipan;
 - na. danda arta;
 - ca. kanorayang;
 - ra. panyangaskara.

(4) Pamidanda.....

- (4) Pamidanda sane katiwakang patut maeor singgih manut ring kasisipane.
- (5) Jinah utawi raja brana, pamidanda ngaranjing dados dhuwer Desa/Banjar.

Pawos 71

- (1) Krama sane langkungan ring tigang paruman ngalantur tan nawur urunan miwah dadandan wenang karampag.
- (2) Rerampagan ngangge tata cara kadi ring sor :
 - ha. Kalaksanaanyang olih Prajuru kasarengin olih Krama saakeha tigang diri maka saksi;
 - na. Sang ngarampag sangkanin darsana ngambil barang utawi nyawenin tanem tuwuh, akehnya manut ring utang sang karampag, sang karampag mangda lila nyukeperahang barangnya sane dados wala;
 - ca. Prajuru/Dulu miteketang mangda barang-barang sane karampag digelis katebus, masenger awuku (7 rahina) ring katus rahinane pacang kaadol;
 - ra. Tan nganinin saluwir barang sane patut inggilang manut A. sane miwah tan mademang pangupa jiwa sang karampag.

Pawos 72

- (1) Prade sang pacang karampag ngawara (ngalengin) palaksanaan inucap mawastu sampun tan nganutin Awig-awig Desa wenang Karang Desa sane kagenahin kadaut olih Desane.
- (2) Samaliha yen purun taler ngalengin palaksanaan kadi ring ajeng tan wenten pamargi sajawaning kasepekang olih Krama Desane.
- (3) Pamidanda inucap ring ajeng keni buntar risampun amakeninin :
 - ha. nunas geng pangampura ring Krama Desa riantukan ngual pasubaya (pararem) pecak;
 - na. nawur pangangan panguak pasubayane duk pacang karampag kadulurin pamrayascitta panyapeap kaiwengane ring Desa.

SAPTAMA SARGAH

NGUWAH - NGUWUHIN AWIG - AWIG

Pawos 73

- (1) nguwah-nguwuhin Awig-awig Desa puniki kalaksanaanyang ring paruman Desa.
- (2) Awig-awig puniki kamargiang ngawit kaingkupin (kararemin).

Pawos.....

Pawos 74

- (1) Sakaluwirin sane wenten saderengnya patut kaanutang ring sadaging Awig-awig puniki.
- (2) Sakaluwiring sane durung kabawos sajeroning Awig-awig puniki patut kalaksanayang manut tata cara sane sampun mamargi kadulurin antuk pararem-pararem.

ASTAMA SARGAH

SAMAFTA

Pawos 75

- (1) Awig-awig puniki kararemin duk rahina Bhuda Paing Wara Wayang, Pangelong ping 11 sasih Kalima isaka 1922 tanggal Masehi 22 Nopember 2000 ring wantilan Desa Adat Apuh.
- (2) Awig-awig puniki kalingga tanganin olih Bendesa lan Prajuru Adat, kasarengin Klian Banjar, saha kasaksinin olih Prajuru Dinas pinaka saksi.
- (3) Luwir sang ngalingga Tanganin :

ha. Kaprathama Prajuru Adat :

1. Bendesa Adat Apuh



I NYOMAN DARANG

2. Panyarikan

Wayan Purna


I WAYAN PURNA

3. Panyarikan Fura

Ketut Mus

I KETUT MUS

4. Klian Banjar Apuh



I MADE KANTOR



Klian Banjar.....

na. Kaping kalih Prajuru Dinas pinaka saksi :

1. Kepala Dusun Apuh



2. Kepala Desa Sebatu.



Mengetahui dan telah dicatatkan

Pada tanggal : 29 Nopember 2001
Nomor : 37 Tahun 2001

BUPATI GIANYAR



TJOKORDA GDE BUDI SURYAWAN,SH.

-----/APUH/-----